

Inunnut paasissutissat oqartussanit suliarineqartarnerisa inatsisit naapertorlugit suliarineqartarnerat pillugu Kalaallit Nunaannut inatsisip atortuulersinnissaa pillugu peqqussummut Namminersorlutik Oqartussat isumaqataanissaat pillugu Inatsisartut aalajangiiffigisassaattut siunnersuut.

(Naalakkersuisut Siulittaasuat)

Saqqummiussissut

Siullermeerneqarnera

Danskit inunnut paasissutissanut inatsisaata Kalaallit Nunaannut atortussanngortinnissaa Inatsisartut 2016-imi akuersissutigivaat. Taamaaliortoqarpoq Kalaallit Nunaata nunatut isumannaatsutut EU-mi akuerineqarnissaa siunertaralugu.

2018-imi taamanikkut paasissutissanik illersuisarneq pillugu najoqqutassiamut 95/46/EF-mut taarsiullugu paasissutissat illersornissaannut najoqqutassiaq nutaaq atortuulersinneqarpoq. Nutaartaanni Paasissutissat illersornissaannut Peqqussut (EU) 2016/679 aamma inatsisit naapertorlugit suliaqartarnissamut najoqqutassiaq (EU) 2016/680 ilaalerput. Taakkua marluullutik nunarsuaq tamakkerlugu paasissutissanik illersuisarnissamut malittarisassanik nutaanik pilersitsiffiupput.

Siunnersuut manna aqqutigalugu Kalaallit Nunaanni eqqartuussivinni paasissutissanik illersuisarnermut tunngavigineqartut danskit eqqartuussivii assigalugit paasissutissanik illersuisarnerit assinganik qaffasissuseqalernissaannut tunngavissamik pilersitsisoqassaaq. Kalaallit Nunaanni eqqartuussiviit inatsisit naapertorlugit suliaqartarnissamut inatsit assigalugu paasissutissanik illersuisarnissamut tunngavinnut ilanngunnissaat, taamaasillutillu inatsisit naapertorlugit suliaqartarnermut maleruaqqusanut assingulernissaat Kalaallit Nunaata nunatut isumannaatsutut akuerineqarnissamut qinnuteqaataat pingaartutut isigineqartariaqarpoq.

Siunnersuummut pingaaruteqarluni tunngavilersuutaasoq aamma tassaavoq innuttaasunut paasissutissat isumannaatsuunissaasa pitsaanerulernissaannik Naalakkersuisut kissaateqarnerat. Siunnersuut aqqutigalugu innuttaasunut Kalaallit Nunaanni Politiinut, unnerluussisussaataitaasunut, eqqartuussivinnut pinerluuteqarsimasunillu isumaginnittoqarfimmut attaveqartunut paasissutissat isumannaatsuunissaat malunnartumik pitsanngortinneqassapput. Oqartussat taakku innuttaasut pillugit paasissutissanik mianernartunik immikkut suliaqartartuupput.

Kalaallit Nunaanni eqqartuussiviit siunnersuummik imaaliallaannaq eqqorneqarnaviangillat. Kalaallit Nunaanni eqqartuussiviit IT-qarnikkut atortuisa paasissutissanik illersuisarnermut piumasaqaatinik eqqortitsisinnaanerisa siunnersuummi ilanngunneqartut

misissuiffigeqqaarnissaat Justitsministeriaqarfiup kissaatigivaa. Tamatuma malunnartumik ajornartorsiutaalernissaanik Naalakkersuisut naatsorsuuteqanngillat. Eqqartuussivinnut IT-qarnikkut nioqquteqartut danskiusimagunik paasissutissat illersornissaannut peqqussummi paasissutissanik suliaqartunut piumasaqaatinut ilanngunneqarsimapput imaluunniit kalaaliugunik paasissutissanut suliaqartunut inunnut paasissutissanut peqqussummi piumasaqaatinut ilanngunneqarsimallutik.

Eqqartuussiviit piaartumik siunnersuummut matumunnga ilaalernissaasa qulakkeernissaa siunertaralugu Naalakkersuisut ineriartornermut malinnaajumaarput.

Taamatut oqaaseqarlunga aalajangiiffigisassatut siunnersuut Inatsisartunut akuersaartumik suliassanngorlugu tunniuppara.